

Pemimpin, rakyat berganding makmurkan negara

Tangkas berfikir tangani masalah, tidak bersekutu tolak wahyu lambang khalifah

Nik Salida Shuhaila

salidasuhaila99@yahoo.com



PELBAGAI bentuk penindasan melanda umat Islam dan negara Islam di dunia hari ini. Kita di Malaysia masih lagi dianugerahkan nikmat tidak terbalas, rahmat daripada-Nya yang sentiasa belas, mengizinkan negara ini terus dibangunkan dengan kestabilan berpanjangan.

Tanggungjawab memakmurkan negara bukanlah terletak di pundak pemimpin semata-mata, sebaliknya setiap rakyat terutama umat Islam perlu sentiasa mengambil berat soal kesejahteraan, keamanan, keharmonian dan ikhlas terhadap perjuangan menyatupadukan hati setiap warga negara.

Apabila melantik pemimpin, ia tidak bermakna orang yang dipimpin menyerahkan tanggungjawab seluruhnya kepada ketua, sehinggalah beban seberat zarah pun tidak ingin dipikul kerana mengharapkan bantuan orang lain yang lebih kuat dan berkuasa.

Alangkah indah andainya setiap seorang di antara kita mengambil berat soal kebajikan saudara seagama sehingga setiap rakyat turut memainkan peranan sebagai pemimpin kepada ahli masyarakat yang lainnya.

Allah berfirman yang bermaksud: *"Dialah yang menjadikan bumi bagi*

kamu mudah digunakan, maka berjalanlah di merata-rata ceruk rantau serta makanlah daripada rezeki yang dikurniakan Allah dan ingatlah kepada Allah jugalah (tempat kembali kamu sesudah) dibangkitkan semula (maka hargailah nikmat-Nya dan takutilah kemurkaan-Nya)." (Surah al-Mulk, ayat 15)

Sebagai umat Islam, al-Quran dan hadis telah tersedia sebagai panduan, bagaimana hendak memakmurkan negara menurut wahyu yang tentunya tidak sekali-kali melanggar tabii manusia, malah itulah lebih utama.

Manusia dilantik khalifah di muka bumi untuk mengurus tadbir dunia dengan sempurna, bukan memusnahkannya, jadi caranya seperti yang diajar Allah SWT.

Malah, jika berlaku sebarang pencerobohan ke atas hak setiap makhluk Allah SWT tanpa keizinan yang direndai Allah SWT, wajiblah kita kembali kepada Allah SWT dengan memohon keampunan dan taubat.

Firman Allah SWT yang bermaksud: *"Dialah (Allah) yang menjadikan kamu dari bahan bumi, serta menghendaki kamu memakmurkannya. Oleh itu, mintalah ampun kepada Allah daripada perbuatan syirik kemudian kembalilah kepada-Nya dengan taat dan tauhid. Sesungguhnya tuhanku sentiasa dekat lagi sentiasa memperkenankan permohonan hambaNya." (Surah Hud, ayat 61)*

Tugas memakmurkan muka bumi adalah wajib ke atas setiap umat Islam untuk mengimbangi keperluan hidup di dunia dan akhirat. Justeru, peranan merancang sekali gus melaku-



MANUSIA berfungsi sebagai penyelamat, bukan cetus permusuhan.

kan setiap perincian pelan strategik negara adalah semata-mata untuk faedah agama, bangsa dan negara.

Firman Allah SWT yang bermaksud: *"Dan ingatlah ketika Tuhanmu berfirman kepada malaikat sesungguhnya aku hendak menjadikan seseorang khalifah di bumi." (Surah al-Baqarah, ayat 30)*

Ketangkasan berfikir untuk menyelesaikan sebarang masalah membabitkan perselisihan antara umat Islam, mengelakkan masalah rendah akhlak, menjauhi skandal dan tidak bersekutu dengan pihak menolak wahyu dan tradisi Rasulullah SAW melambangkan keperibadian khalifah di bumi.

Sebaliknya, permusuhan dan persengketaan hanya membawa misi kegagalan, bahkan memalukan apatah lagi dengan gelaran khalifah yang dikurniakan Allah SWT.

Allah SWT berfirman yang bermaksud: *"Sesungguhnya Allah tidak akan mengubah apa yang ada pada sesuatu*

kaum sehingga mereka mengubah apa yang ada pada diri mereka sendiri." (Surah al-Ra'du, ayat 11)

Dalam surah al-Qasas, ayat 77, Allah SWT merakamkan firman-Nya yang bermaksud: *"Dan tuntutanlah dengan harta kekayaan yang telah dikurniakan Allah kepadamu akan pahala dan kebahagiaan hari akhirat dan janganlah engkau melupakan bahagianmu (keperluan dan bekalanmu) dari dunia, dan berbuat baiklah (kepada hamba-hamba Allah) sebagaimana Allah berbuat baik kepadamu (dengan pemberian nikmat-Nya yang melimpah-limpah)."*

Kita seharusnya sedar setiap apa yang dilakukan di dunia adalah untuk mendapatkan keredaan Allah. Setiap komitmen untuk memajukan diri, membangunkan modal insan mestilah berpaksikan hukum, supaya tidak tersilap mengatur langkah, walaupun tiada niat menyesatkan orang lain.

Selain itu, setiap individu mestilah

menanam tekad dan hasrat memba-wa diri selurus-lurusnya mengikut landasan dibina Rasulullah SAW dan khulafa sesudahnya dengan susah payah. Kita perlu memahami hakikat tiada kehidupan sesudah mati melainkan apa yang dijanjikan-Nya.

Justeru, tentulah kita pasrah terhadap peraturan alam dan kehidupan. Tiada apa boleh dibanggakan di dunia ini melainkan semuanya perhiasan semata-mata, bukan ia tidak boleh dimanfaatkan, tetapi biarlah membawa keuntungan kepada diri.

Dengan mendekatkan jurang peribadi setiap Muslim, supaya semua mengikut *qudwah hasanah* Rasulullah SAW, sahabat dan wanita beriman yang hampir dengan Baginda, umat Islam mestilah mengisi dada dan hiasi personaliti dengan ilmu serta nilai murni.

Itulah yang akan mengangkat darjah ummah untuk menjadi lebih baik daripada sebelumnya. Memakmurkan negara bukanlah satu tanggungjawab yang enteng kerana untuk menjadi umat berkualiti, memakan masa berpuluh malah beratus tahun lamanya.

Melainkan mulai hari ini, setiap individu Muslim menghantapkan siasah dan menekuni jihad kehidupan dunia untuk kesejahteraan di akhirat kerana hanya orang yang berilmu dan mempunyai pegangan agama saja boleh merealisasikan wawasan agama dan negara.

**Penulis ialah Pensyarah Kanan
Fakulti Syariah dan Undang-Undang,
Universiti Sains Islam Malaysia**